

NA MANIMA YA RIDO YA NTANGU



Mu zolaka kusamuna awa ti bisambu ya beno me pesama mvutu, ya me vwanda balukutakanu mutindu beto vwanda kuzwaka na ntangu mu bandaka ntete na ministele, bamvula mingi me luta. Mu me kuzwaka ntete ve. . . Beto lendaka kaka ve kuvwandisa bantu. Mpe vwanda baka bisika ya foire mpe nyonso yina yankaka, ya zolaka vwanda na bantu mingi kuna na ngunga ya tatu, ke fulusa kisika. Ba zolaka kanga myelo, zolaka bika ve bantu kukota. Beto zolaka vwanda ve kuna tii ngunga ya sambwadi. Beno me mona? Kaka mafunda yina ke na kutiamuka bisika nyonso. Kaka. . .

2 Mpe mu bakaka bankokila tanu ya nsuka na balukutakanu ya nsuka, mpe mu salaka kaka kutunga na zulu ya Ndinga, na kubandaka na kubakula wapi ngolo vwandaka na Ndinga. Beno me mona? Samu ti, Ndinga kele Nzambi. Beno me mona? “Na mbandukulu vwandaka Ndinga, Ndinga vwandaka na Nzambi, mpe Ndinga vwandaka Nzambi. Mpe Ndinga kumaka nsuni mpe zingaka na kati-kati ya beto.”

3 Ntangu yayi, Hebreux 4 ke tuba ti, ti, “Ndinga ya Nzambi me lutila meno na mbele ya meno ya balweka zole.” Beno me mona? “Ndinga ya Nzambi me lutila meno, mpe ke tobula tii na mukwa, mpe ke zenga, mpe mufundisi ya mabanza ya dibanza, ya ntima.” Beno me mona? Ya kele yina ya kele, Ndinga ya Nzambi.

4 Na yina kana ya kele na dikabu na kisika beto lenda pema kaka beto mosi; mpe Ndinga, Yawu mosi, yina kele Klisto, Yina kele Ndinga, kukota na kati ya beto, mpe kuswasikisa mabanza ya yintu, mutindu beno me mona yawu. Beno me mona? Mutindu ya kele mbote mingi. Kuna, na kumona mutindu Yandi me sala mpe mutindu Yandi me sakumuna beto! Mpe dyaka. . .

5 Ti, ya kele yina mu ke kuwa, na kutungaka yawu na ziunga ya Ndinga yina na bankokila yiya, kubika kaka bantu kuvwanda swi, mpe kuna kupema kaka, mpe Mpeve-Santu zolaka bokila bantu mpe kusala mambu na kati ya bantu.

6 Mpe kuna, na nkokila ya nsuka, Lumingu me luta na manima ya midi, Mu monaka mosi ya bandonga ya kulutula nene ya kubeluka yina mu me monaka ntete ve na Amerika. Beno me mona? Bawu vwandaka. . . Mu tindaka Billy kuna na bakalati nkama mosi, mpe Gene na nkama mosi, mpe Leo na nkama mosi, mpe Roy na nkama mosi, bawu kabulaka kaka bakalati nyonso, pene ya bankama tanu. Mpe kuna na manima bantu kumonaka Ndinga kukota na kisalu, mpe yina Yawu zolaka sala, mpe na

kukangamaka kaka na zulu ya Ndinga yango kuna, nataka bawu na estrade. Mpe mu monaka babakala mpe bakento kulosa babéquille ya bawu, mpe nyonso yina, mpe kubeluka ntete kwandi bawu kukuma na estrade, kaka na kumonaka. Beno me mona? Ndinga ya Nzambi basikaka ntete, kuna na estrade, mpe kotaka Yawu mosi na Bansangu tanu yina, to Bansangu yiya, na kati ya bantima ya bawu, tii bawu kwikilaka Yawu na bantima ya bawu nyonso. Na yina, kima mosi kaka bawu zolaka sala, vwandaka kuzwa mutindu mosi ya mwa kisimbidi, beno me mona, kima mosi yankaka, mpe yina vwandaka kieleka. Mpe kaka na ntangu bawu zolaka kuma na estrade yina, bawu zolaka beluka kaka kuna na es- . . . kaka ntete bawu sabuka estrade.

⁷ Mu banza, bampangi awa, beno nyonso zaba Mpangi Ed, Mpangi Ed Hoover. Mutindu yina ve? Beno yina me katuka na Arkansas, kuna? Yandi kutanaka . . . Yandi vwandaka na munu na kubanda ya ministele. Yandi tubaka, “Yayi ke monana mutindu bantangu ya ntama,” yandi tubaka, “ya kele mutindu na ntangu bawu vwanda salaka, bamvula me luta.”

⁸ Mpe ya vwandaka na bantu yina vwandaka na kivimbu yina vwandaka—vwandaka mutindu *yayi*, yina vwandaka vutuka, na mavimpi ya mbote. Bantu ya kufwa meso, bantu ya kufwa makutu, bibaba, mitindu nyonso ya bima yina Mfumu ya beto kusalaka. Beto zolaka simba ata mbala mosi ve bantu. Ndinga vwandaka basika vwandaka sala yawu.

⁹ Na yina Mfumu pesaka munu Nsangu yina mu ke zola kutuba na dibuundu, na ntangu mosi, ntangu mu ke vutuka, kana mu kuzwa siansi. Mu kele kieleka na bisalu mingi. Ntangu yayi mu fwana kwenda dyaka, mbasi, mu ke na kuvingila mwana ya kento yayi na kukwiza. Mpe ata mpe ntete mu kukotisa valize ya munu na kati ya yinzo, ya vwandaka na muntu kuna. Mpe tuka, na mpasi mu me vwanda. Beno me mona? Mu me zonza ntete ve na dibuta ya munu tuka mu me kukwiza. Beno me mona? Mpe ya kele—ya kele kieleka kizitu. Mpe mu ke lomba bisambu ya beno nyonso samu na munu, mpe, ti Mfumu ke sadisa munu na kutelama.

¹⁰ Ntangu yayi . . . [Kisika ya mpamba na bande—Mu.] Mu ke mona mpangi ya beto awa, yina kele kieleka, kieleka ya kubela, ya kulala na mbeto yayi. Mpe beto . . .

¹¹ Muntu ke na kwiza, na mwa ntangu fyoti, samu na beto, na kukwenda na Louisville. Mu zola ti beno bambuka moyo na kisambu, mpe, na mama mosi ya ntwenya ya mbote, yina na kutala, yandi kele na bamvula kumi na nana. Yandi kele dipasa, mpe mwana ya kento ya Muklisto yina ke kwendaka na lukolo. Mpe bana yankaka ya bakento vwanda zonzila na yandi, beno zaba, na bana ya bakento zole, mpe kutuba na bawu mutindu bawu vwandaka, mutindu ya kitini ya luzingu bawu vwandaka kondwa, mpe mutindu bawu zolaka zinga mutindu bana nyonso

ya bakento. Mpe mosi ya bana ya bakento vwandaka kaka na lenda ya kutambula na zulu ya yawu. Mosi yankaka yayi kuzwaka complexe, mpe yandi kuwaka kieleka yimbi samu na yawu, mpe landilaka kaka na kukulumuka, mpe kukwenda ntama na manima, mpe ke na kukikwamisa samu na yawu. Mpe na nsuka yandi me kuzwa mpasi ya yintu. Mpe bawu. . . Yandi kele na kivinga ya bilawu. Mama mpe tata ya yandi ke na kukwizaka, na mwa ntangu kaka fyoti, ke na kukatuka na Crandall, na Indiana, samu na kukwenda kuna na yinzo ya bambevo yayi kisika ba ke meka na kutinda yandi, mbasi, na Madison.

¹² Ntangu yayi, mwana ya kento yango, ya kele na ata mpasi ve na nzutu ya mwana ya kento yango. Yandi. . . Ya kele ve na kima mosi, na nzutu. Yandi kele na mavimpi ya mbote. Kasi ya kele mpasi mingi na kubangula yawu. Mpe kieleka ba lenda bangula yawu ve. Yina ya kele, ya kele mpeve ya yandi ke na kuyenga-yenga. Beno me mona? Na yina, beno—beno fwana simba mpeve ya yandi mpe kuvutula yawu na kisika. Beno me mona? Ya kele. . .

¹³ Kaka mutindu, beto vwandaka me lutila na kuzonzila yawu awa, mwa basabala me luta, na mutindu ke tambulaka nzutu ya muntu. Mutindu ya kele na ba-sens tanu na nzila ya yina beno ke sadilaka nzutu, mpe kuna banzila tanu mutindu beto ke bokila yawu. Banzila tanu, mosi mutindu—mutindu konsiansi, mbanzulu, mpe nyonso yina, na nzila ya yina beto ke kotaka na moyo. Mpe kuna ntangu beno ke kota na mpeve, ya kele kaka na nzila mosi, mpe yina kele na nzila ya luzolo ya muntu, yina ke vwandisa yawu mutindu muntu kuvangamaka.

¹⁴ Beno lenda kuzwa Yawu, to beno lenda manga kaka Yawu. Beno lenda ndima Klisto mutindu Mvulusi, to kumanga kaka Yandi. Mpe beno kele dyaka na lweka ya Yinti yina, na yina mosi ya Luzingu mpe mosi ya lufwa. Muntu nyonso ya moyo kele ya kutula na ntwala ya Yinti yina, to Nzambi ke vwanza ya kusungama ve samu na kutula mosi kuna, mpe kuna kupesa ve siansi mosi na yankaka na—na kusola kieleka to yimbi. Mpe mosi na mosi ya beto kele na bweso yina.

¹⁵ Mpe, na yina, mpeve, beto lendaka beluka, to beto lendaka beluka ve. Ntangu yayi, ya kele ve samu ti ya kele ve. . . ti beto belukaka ve landila Nzambi. Beto kele. Samu na ngwisani ya kele kukondwa musiku. Mpe Yandi futaka yimeni kubeluka ya beto. Na yawu, kubeluka ya beto kele—kele ya beto. Ya kele ya beto. Ntangu yayi, ya kele to beto ke baka nzila *yayi*, samu na kukwikila yawu; to nzila *yayi*, samu kaka na kukwikila yawu ve. Ntangu yayi, ya kele kaka na mutindu mosi yina ti beto lenda kota na Mvwandulu ya Nzambi.

¹⁶ Ntangu yayi, mwana yayi, ya kitoko, mama ya yandi kele nkundi ya munu ya kento. Munu, ya munu. . . Oh, yandi na

ntangu ya ntama vwandaka mosi ya bankundi ya munu ya kento. Yandi vwandaka mwa mama mosi ya ntwenya ya mbote, yina basikaka na yinzo mosi ya kieleka ya kusungama ya ba-Nazaréen, mwa mwana mosi ya kento ya mbote. Mpe yandi kele na bakala mosi ya luzolo. Mu zaba yandi, mpe, kieleka mbote, mwana ya bakala yina kwelaka yandi. Mpe yandi kele kaka mwa . . . Bawu me kulisa bana yango samu na kusadila Mfumu, mpe tulaka bawu na lukolo. Mpe bawu vwandaka kieleka ya kukangama ngolo na Klisto, na kusala ve bima yina kele yimbi. Kasi kuna yawu me kuma.

17 Kaka muvusu, kaka mutindu mu me . . . tala kaka na manima ya mwa ntangu fyoti, mpe vwandaka me tala ntwenya mosi ya bakala na manima kuna, yina kuzwaka kima kaka ya mutindu mosi, kieleka. Mpe na . . . Beto kwendaka kuna mpimpa mosi, na yinzo ya Mpangi Wright, mpe Orville vwandaka kaka—kaka na kati ya muvusu ya muvimba. Mpe yandi, beno zaba, kuna yandi vwandaka meka na kubasisa munu na yinzo; mutindu beto kele bankundi ya mbote Orville na munu, kieleka kaka mutindu ti mu kele tata ya yandi. Mu kwelisaka tata mpe mama ya yandi, kintwadi. Mpe yandi vwandaka dumuka kaka mpe vwandaka boka, “Basika awa! Basika awa! Basika awa!” Beno me mona?

18 Ntangu yayi, yina beto zolaka sala kuna vwandaka kukota na nzila ya mpeve mpe kusimba mpeve ya mwana ya bakala yina. Beno me mona? Bampasi mingi kwizaka na mwa ntima ya yandi. Yandi kele ntwenya, mpe yandi monaka mingi. Mpe mu vutulaka yandi kaka na kisika yina yandi zolaka vwanda. Beno me mona? Na mwa bilumbu fyoti, yandi vwandaka—yandi vwandaka mbote mingi.

19 Ntangu yayi, ya kele kima mutindu mosi yina beto fwana sala na yayi. Mu me mona yawu, mpe mu zaba ti ya kele kieleka. Kasi ntangu yayi, kaka . . . Mu—mu ke lomba na beno nyonso na kusambila ntangu yayi, ti—ti Nzambi kusadisa munu na kuzwa ntwenya ya kento yayi. Kuna na kisika, kisika yandi zaba ve kisika yina yandi kele, na manima kuvutula yandi na kisika ya yandi. Nzila yina ke kwizaka na nzila ya lukwikilu. Beno me mona, yandi lenda vwanda ve na lukwikilu samu na yandi mosi. Yandi zaba ve kisika yina yandi kele, to kima mosi. Beno me mona? Ya—ya ke lomba awa lukwikilu ya beto.

20 Mpe ntangu yayi, na yina, na ngolo ya mvumbukulu ya Klisto, na yina Yandi me pesa beto bweso. Ya kele kisika, beno, na mutindu mosi, Ndinga ya Nzambi ke tobulaka musumuki. Mpe Yawu fwana kwenda ntama na zulu ya kulonga ya Ndinga ke basika. Ya kele samu na yina mu zolaka kuzonza mwa fyoti na suka yayi na ntuala mu sambila samu na bambevo. [Kisika ya mpamba na bande—Mu.]

21 Beno ke bambuka moyo na vision, Mfumu pesaka munu, ntama mingi ve, beno zaba, na yina me tala Lweka yankaka?

Beno ke bambuka moyo na suka yina ntangu mu vwandaka pesa kimbangi na zulu ya kumona Lweka yankaka? Mbote, ya vwandaka kieleka.

²² Mpe *Ndinga* ya Bantu ya Mumbungu ya Nsangu ya Mbote ya Muvimba samunaka mukanda yango, mpe tulaka foto na zulu ya paze awa. Mpe ya kele na mwa kima ba me kotisa na yisi awa, mwa kitini mosi awa na yisi, yina ke zonzila na ministele. Na yina, yayi kele mukanda ba me basisa na bandinga mingi samu na yinza ya muvimba. Mpe bawu kukubikaka paze ya mantwala, mpe ya ntete, samu na vision yina. Beno me mona?

²³ Mpe mu kele na yawu awa, mpe mu zola ti beno baka mosi, mpe beno lendaka tanga yawu. Mpe kutelema. . . Mu zabaka ve bampangi yikwa, ke vwanda, na suka yayi. Mpe beno, na yina, kana beno kondwa na kuzwa mosi, mbote, beno kwenda kaka na bilo. Ba kele na yawu kuna na bilo. Mpe ba pesaka beto lutangu mosi ya yawu, na zulu ya: “Kulandila na kukwenda na ntuala.” Beno me mona? Mpe yina kele nyonso yina kele na kati ya ntima ya munu. Nyonso mu lenda kuwa, kele, “Kulandila na kukwenda na ntuala.” Kaka na simu yina ya nzadi ya kele na Yinsi ya kulutila kitoko. Mpe na yawu beto landila na kukwenda na ntuala tii beto ke kutana na Yinsi yina.

²⁴ Ntangu yayi, mu banza ti ba kele awa na lusakumunu ya mwana mosi ya Mpangi Stricker mpe Mpangi ya kento Stricker. Na yawu ti. . .

²⁵ Ya ke sala bawu yikwa na ntangu yayi, Mpangi ya kento Stricker? [Mpangi ya kento Stricker me tuba, “Sambanu.”—Mu.] Bana ya fyoti sambanu. Yina kele mwa dibuta mosi ya kitoko.

²⁶ Mpe na yawu bawu kele. . . bawu vwandaka ba-missionnaire ya beto na—na Afrika, me vutuka, ntama mingi ve. Mpe bana ya bawu nyonso kele mwa bana mosi ya kitoko. Mpe mu lenda mona yandi yayi, mpe, na yina bawu ke na kunata yandi na suka yayi samu na lukutakanu ya lusakumunu.

²⁷ Wapi kisika kele Teddy? Teddy, nge zola kukwiza awa na piano, kaka mwa ntangu fyoti, mwana? Mpe—mpe ti beto baka nkunga ya beto, mwa nkunga mosi, beno zaba, nkunga ya fyoti yina, mu banza, beto ke yimbaka, *Beno Nata Bawu*. Ya kele kieleka? “Beno nata bawu ntama ya bilanga ya disumu.”

²⁸ Mpe ya kele, samu na yina beto ke bula yayi, samu ti beto, na nyonso yina beto lenda, bibuti, kele kunata bawu samu na lusakumunu. Beto ke pesa bawu na Mfumu mpe kunata bawu na kati na yina ba kele ntete ba-bébé, ti bawu ke zimbana ve na bilanga yina ya disumu. *Beno Nata Bawu Na Kati*. Beto kaka. . . Nge zaba yawu, Teddy? Beto yimba kaka nzila mosi ya yawu ntangu yayi.

Beno nata bawu, beno nata bawu,

Beno nata bawu ntama ya bilanga ya disumu;

Beno nata bawu. . .

Kana ya kele na mosi dyaka, na yina, beno nata kaka yandi.

Beno nata bana ya fyoti na Yesu.

Beno nata bawu, beno nata bawu,

Beno nata bawu ntama ya bilanga ya disumu;

Beno nata bawu, beno nata bawu,

Beno nata na Yesu bayina me zimbana.

²⁹ Mpangi Stricker mpe Mpangi ya kento Stricker, mu me zaba ti beno zaba yina nkunga yina zola kutuba, na “kunata bawu,” nsatu ya tiya yina ke na kupela na kati ya ntima ya beno, samu na kumeka na kunata bayina me zimbana na Yesu. Mwana ya beno ya bebe, kana yandi zolaka kufwa ntete ba sakumuna yandi, to yina nyonso yankaka, yandi kele ya kuvuuka, na mutindu nyonso, samu ti Menga ya Yesu Klisto kusalaka yawu na Calvaire. Kasi na lubambuku moyo na nzyetolo ya Yandi ya nene na ntoto, ntangu Yandi tulaka maboko ya Yandi na zulu ya bana ya fyoti mpe tubaka, “Beno bika bawu kwiza na Munu,” ya kele samu na yina beno ke nata bebe na suka yayi. Mpe na kutulaka kivuvu na beto ti, beto ke vwanda na lenda ya kusala kisambu ya lukwikilu, samu na mwana ya fyoti yayi, na lusakumunu ya luzingu ya yandi na Nzambi.

³⁰ Yinki kele nkumbu ya yandi? [Tata me tuba, “Marilyn Madge Stricker.”—Mu.] Marilyn Madge, Marilyn Madge Stricker. Yandi me kuma na bangonda yikwa? [Mama me tuba, “Bangonda kumi na tatu.”] Bangonda kumi na tatu. Yandi me butuka na Afrika, mutindu yina ve? [“Yinga.”] Mbote, ti, kana ya kele na mbasi mosi, ti mwana yayi kuvwanda missionarye kuna, na bilanga kisika ba me buta yandi. Mpe mwana mosi ya kitoko mingi. Nge zola kukwiza, Mpangi Neville?

³¹ Mpe, Marilyn. Oh, la la! Mu ntangu nyonso ke zolaka bana ya fyoti yayi. Yayi kele ve mwa mwana mosi ya kitoko? Wapi faso? Wapi faso? Beto kulumusa bayintu ya beto. Mu zola beno, beno tula maboko ya beno na zulu ya yandi.

³² Tata ya beto ya Mazulu, beto ke nata na Nge mwana Marilyn Madge Stricker, mwa mwana yayi ya kitoko yina butukaka na bilanga ya kumwangisa nsangu, na ntangu mvita vwandaka kwenda ngolo mingi. Mu ke sambila ti Nge ke sakumuna mwana yayi. Na kati ya Biblia, ba nataka na Nge bana ya fyoti mutindu yayi. Nge tulaka maboko ya Nge na zulu ya bawu mpe sakumunaka bawu, na kutubaka, “Beno bika bana ya fyoti kukwiza na Munu, mpe beno yimina bawu ve; samu ti ya kele mutindu Kimfumu ya Mazulu.”

³³ Mama mpe tata me tula yandi na maboko ya beto, bubu yayi. Beto, na nzila ya lukwikilu, ke mata bimatini, kuna, samu na kutula yandi na maboko ya Nge, na nzila ya lukwikilu. Sakumuna luzingu ya yandi. Pesa yandi luzingu ya yinda, Mfumu. Ti yandi kuvwanda mwana ya Nzambi. Ti yandi sadila Nge na luzingu ya yandi nyonso, na konso nsinga ya nzutu ya

yandi, ti yandi kuvwanda kisadi ya Klisto. Pesa yawu, Tata. Sakumuna tata mpe mama ya yandi, bantwenya ya yandi ya bampangi ya babakala mpe ya bakento. Ti bawu kukula, mpe, mpe kuvwanda dibuta mosi ya nkembo samu na kisalu ya Nzambi.

³⁴ Tata, beto ke pesa mwana Marilyn Madge na Nge, na Nkumbu ya Yesu Klisto, samu na luzingu ya kisalu. Sakumuna yandi, mpe tata ya yandi, mpe mama ya yandi, mpe bampangi ya yandi ya luzolo. Mpe ti bawu kuzinga bilumbu mingi, na baluzingu ya kyese na kisalu ya Nge. Na Nkumbu ya Yesu. Amen.

³⁵ Nzambi sakumuna nge, Mpangi Stricker. Nzambi sakumuna nge. Balusakumunu na zulu ya mwana ya ntwenya ya kitoko yayi.

Matondo na nge, Teddy, mwana.

³⁶ Mu ke zolaka bana ya fyoti. Beno ve?

³⁷ Bantu yikwa me kuwaka ntete ve vision Mfumu pesaka munu? Beno bika beto tala maboko ya beno na zulu, bayina ata mbala mosi ve. Mpangi Neville, nge kele na mwa buku ya nge kuna, mu banza, mu banza ti nge ke tanga kaka yawu samu na bawu awa, kaka samu na mwa ntangu mosi to zole. Mu banza ya kele. . . Kaka awa, kana nge zola.

³⁸ [Mpangi Neville ke na kutangaka na na mukanda ya Ngonda ya zole, ya mvula 1961 ya *Full Gospel Men's Voice*—Mu.]

[Na suka yankaka yina mu vwandaka ya kulala na zulu ya mbeto ya munu. Mu vwandaka me vumbuka kaka na mpongi, mpe mu tulaka maboko ya munu na manima ya yintu ya munu mpe vwandaka pemisa yintu ya munu na zulu ya kuse. Kuna mu bandaka na kumiyufula wapi mutindu ya ke vwanda na Lweka yankaka. Mu bakulaka ti mu vwandaka me zinga mingi kulutila ndambu ya luzingu ya munu kana mu zinga na kuvwanda mpe kiboba mutindu bantu ya munu, mpe mu vwandaka zola kusala ya kulutila samu na Mfumu ntete mu bika luzingu yayi.]

[Mu kuwaka Ndinga kutuba: “Nge me banda kaka! Landila na kunwana mvita! Landila na kunwana!” Na yina mu vwandaka kuna vwandaka banza na bampova yina, mu banzaka ti mu kuwaka kaka Ndinga. Ndinga tubaka dyaka: “Landila na kunwana mvita! Landila na kukwenda! Landila na kukwenda!” Mu vwandaka kwikila kaka ve, mu banzaka ti ya lendaka vwanda mu zonzaka bampova munu mosi. Mu tulaka bikoba ya munu na kati-kati ya meno ya munu mpe tulaka diboko ya munu na zulu ya yinwa ya munu mpe vwandaka kuwa. Ndinga zonzaka dyaka: “Landila kaka na kunwana! Kana nge zabaka kaka yina kele na nsuka ya nzila!” Mu vwanda kuwa mutindu muziki mpe bampova ya nkunga ya ntama, yina mu zabaka mbote:]

[Mu kele na nsatu ya yinsi mpe na kyadi, mpe mu zola kumona Yesu,]
 [Mu ke zola kuwa kudila bangunga ya dibungu,]
 [Ya ke lezimisa nzila ya munu mpe ke katula boma nyonso;]
 [Mfumu, bika mu tala na manima ya rido ya ntangu.]

[Na yina Ndinga yufulaka: “Nge ke zola kumona kaka na manima ya rido?” Mu pesaka mvutu: “Ya ke sadisa munu mingi!”]

[Mu zaba ve mutindu ya kutuba yina kusalamaka. Kana mu vwandaka na kati ya nzutu ya munu to na nganda ya yawu, to kana ya vwandaka kunatama, mu zaba ve, kasi ya vwandaka mutindu mosi ve na vision nyonso yina mu me kuzwaka ntete. Mu vwanda lenda kumona kisika yina ba bakaka munu mpe mu vwanda lenda kumona munu mosi ya kulala kuna na zulu ya mbeto ya munu. Mu tubaka: “Yayi kele kima ya ngitukulu!”]

[Ya vwandaka na lutangu ya nene ya bantu mpe ba vwandaka kwiza na mbangu na kupesa munu mbote, ba vwandaka boka: “Oh, mpangi ya beto ya ntalu!” Ba ya ntete na kukwiza vwandaka bantwenya ya bakento, na kutala vwandaka na kati ya bamvula ya ntete ya makumi zole, mpe na yina bawu vwandaka bumbasana na munu bawu vwandaka tuba: “Mpangi ya beto ya ntalu!” Bantwenya ya babakala, na kitoko ya bungolo ya buntwenya, na meso vwandaka lezima mutindu bambwetete na ndombi ya mpimpa, na meno mpembe mutindu bapalata, vwandaka bumbasana na munu, na kutubaka, “Mpangi ya beto ya ntalu.”]

[Mpe mu talaka ti munu, mpe, mu kumaka dyaka ntwenia. Mu talaka munu mosi kuna mpe mu balukaka mpe talaka nzutu ya munu ya ntama ya kulala na zulu ya mbeto na maboko ya munu na manima ya yintu ya munu. Mu tubaka: “Mu ke na kubakula yayi ve!”]

[Na yina mu bandaka na kumeka na kubakula kisika mu vwandaka, Mu bandaka na kubakula ti ya vwandaka ve na mazono mpe mbasi kuna. Ya vwandaka monana ti muntu mosi ve vwandaka ya kulemba. Na yina nkonga bantwenya ya bakento ya kulutula kitoko yina mu me monaka ntete ve vwandaka losa maboko ya bawu na zulu ya munu, mu bakulaka ya vwandaka kaka na zola mosi ya nene yina vwandaka fulusa munu mpe ata kubenda ya nzutu mutindu na kati ya nkadulu ya bumuntu. Mu talaka bantwenya ya bakento yayi nyonso vwandaka na nsuki ya bawu ya kubwa

tii na luketo ya bawu mpe bazupe ya bawu vwandaka kwenda tii na makulu ya bawu.]

[Na manima ya yayi, Hope, kento ya munu ya ntete, kangaka munu ngolo na maboko, mpe tubaka: “Mpangi ya munu ya ntalu!” Na manima ntwenya yankaka ya kento me kanga munu ngolo na maboko mpe Hope me baluka mpe me kanga ngolo na maboko ntwenya ya kento yango. Mu tubaka: “Mu ke na kubakula yayi ve. Yayi kele kieleka kima ya kuswaswana na zola ya beto ya bumuntu. Mu zola ve kuvutuka na nzutu yina ya ntama na zulu ya mbeto.”]

[Na yina Ndinga mosi tubaka na munu: “Yayi kele yina nge longaka ti Mpeve-Santu kele! Yayi kele zola ya kulunga. Kima ve lenda kota Awa kukondwa yawu!”]

[Na manima ba nataka munu mpe vwandisaka munu na kisika ya zulu. Nyonso na ziunga ya munu vwandaka balutangu ya nene ya babakala mpe ya bakento na kitoko ya buntwenya ya bawu. Ba vwandaka boka, na kyese: “Oh, mpangi ya beto ya ntalu, beto kele na kyese mingi na kumona nge awa!” Mu banzaka: “Mu ke na kulotaka ve, samu ti mu lenda mona bantu yayi mpe mu lenda mona dyaka nzutu ya munu ya kulala kuna na zulu ya mbeto.”]

[Ndinga me tuba na munu: “Nge zaba ya kele ya sonama na kati ya Biblia ti bapofete vwandaka ya kuvukana na bantu ya bawu.” Mu tubaka: “Yinga mu ke bambuka moyo na yawu na Masonuku, kasi ya kele ve na ba-Branham mingi mutindu yayi.” Ndinga vutulaka: “Bayayi kele ve ba-Branham. Bayayi kele mindimi ya nge, bayina nge me twadisa na Mfumu. Bayankaka ya bakento yayi yina nge ke na kubanza kele bantwenya mpe kitoko vwandaka na bamvula na zulu ya makumi yivwa na ntangu nge twadisaka bawu na Mfumu. Kuyituka ve ti ba ke na kulooka, ‘Mpangi ya munu ya ntalu!’” Kuna nkonga ya bantu kubokaka kintwadi: “Kana nge kwendaka ve na kusamuna Nsangu ya mbote, beto zolaka vwanda awa ve!”]

[Mu lombaka: “Oh, wapi kisika kele Yesu? Mu zola kumona Yandi!” Bantu vutulaka: “Yandi kele mwa zulu dyaka. Kilumbu mosi Yandi ke kwiza na nge. Ba fidisaka nge mutindu ntwadisi, mpe ntangu Nzambi ke kwiza, Yandi ke fundisa nge landila malongi ya nge.” Mu yufulaka: “Paul mpe Pierre fwana kutelama mpe na mantwala ya lufundusu yayi?” Mvutu vwandaka: “Yinga!” Mu tubaka, “Mu longaka yina bawu longaka. Mu tengamaka ve na Yawu na lweka mosi to yankaka. Kisika ba botikaka na Nkumbu ya Yesu, mu salaka mpe; kisika ba longaka Mbotika na Mpeve-Santu, mu salaka mpe. Nyonso bawu longaka, mu longaka, mpe.”]

[“Beto zaba yawu,” bantu bokaka, “mpe beto zaba ti beto ke vutuka na ntoto na nge kilumbu mosi. Yesu ke kwiza mpe ke fundisa nge landila Ndinga nge longaka beto. Kuna nge ke lakisa beto na Yandi, mpe beto nyonso kintwadi beto ke vutuka na ntoto samu na kuzinga ntangu nyonso.” Mu yufulaka: “Mu fwana vutuka dyaka na ntoto, ntangu yayi?” Bawu pesaka mvutu: “Yinga, kasi landila na kukwenda!”]

[Na yina mu bandaka na kukatuka kisika yina ya kitoko, ya kyese mingi, mutindu meso ya munu lendaka na kumona, bantu vwandaka kwiza na munu na kubumbasana na munu, vwandaka boka: “Mpangi ya munu ya ntalu!”]

[Na mbala mosi mu vutukaka dyaka na mbeto. Mu tubaka: “Oh, Nzambi, sadisa munu! Kubika munu ata mbala mosi ve kubebisa na Ndinga. Bika mu vwanda ya kusungama na Ndinga. Mu ke kipe ve yina muntu nyonso yankaka ke sala, Mfumu, bika mu landila na kukwenda na kisika yina ya kitoko, ya kyese!”]

[Mu me ndimisama mingi kulutila na luzingu ya munu ti ya ke lomba zola ya kulunga na kukota na kisika yina. Ya vwandaka na ata kimpala ve, ata kulemba, ata kimbevo, ata kununa, ata lufwa. Kaka kitoko ya nene mpe kyese!]

[Ata nyonso yina beno ke sala, beno tula nyonso yankaka na lweka tii ntangu beno ke kuzwa zola ya kulunga! Beno kuma na kisika beno lenda zola muntu nyonso, ata mpe mbeni nyonso. Ata kana ti mpepo ke na kuningana, ti lusyemo ke na kusala, to ti minduki ya mbeni kele na zulu ya beno, bima yina kele na ata mfunu ve: beno kuzwa zola ya kulunga!]

[Kana beno kele ya kuvuuka ve, beno ndima Yesu Klisto mutindu Mvulusi ya beno ntangu yayi! Kana ba botikaka beno ve na kukotaka na maza, beno botama ntangu yayi! Kana beno me kuzwaka ve Mbotika na Mpeve-Santu, beno kuzwa yawu ntangu yayi! Beno landila na kukwenda na zola yina ya kulunga yina ke nata beno na kisika yina ya kitoko mpe ya kyese na manima ya rido ya ntangu!]

³⁹ Matondo na nge, Mpangi, samu na yawu. Yina kele. . .Mu banzaka, na kutala, bayankaka na kati ya beno ke kuzwa ntangu ya kutanga yawu. Mpe kana beno kele ve na mwa buku yango, na yina, beno lenda baka yawu.

⁴⁰ Kuna, kaka na yisi ya paze, yandi kotisaka mwa kima na yina me tadila ministele kuna. Mu zaba ve kana beno talaka yawu to ve, kaka na yisi, na manima beno me tanga yawu. Kaka na yisi, mwa kima ba me kotisa na yisi. [Kisika ya mpamba na bande—Mu.]

41 Ntangu yayi, yina ke kwendaka na kutala pene na bandinga nyonso na yisi ya mazulu, beno me mona, samu—samu ba tanga na yinza ya muvimba.

42 Ntangu yayi, “Yinki—yinki . . .” mbote, beno ke tuba, “yinki nge zola kutuba na yawu, Mpangi Branham, ntete nge sambila samu na bambevo?”

43 Ya kele samu na yayi: ti beto lendaka zaba ti bangolo ya beto kele mpamba ve. Beno me mona? Beto fwana belama na Nzambi na nzila ya kanale yina ya luzolo mpe lukwikilu. Lukwikilu ke nata beto na kanale yina. Luzolo kele yina ke nata beto na kati. (Beno lemvokila munu.) [Kisika ya mpamba na bande—Mu.]

44 Ntangu yayi, beno ke banza ti Nzambi ke . . . Ntangu yayi bika beto . . . Ntangu yayi, lukwikilu ya beno ke kuma na kisika mosi ntangu yayi, beno ke banza ti . . . ? Yinki beno ke banza ntangu yayi kana bangolo nyonso yina . . . tabernacle yayi mpe bankonga yayi ya bantu awa me sala, samu na Kimfumu ya Nzambi? Ya kele na mingi awa yina me nkufina madya ya bana ya beno, samu na Kimfumu ya Nzambi. Ya kele na mingi awa yina me bika kusumba bilele, samu na Kimfumu ya Nzambi. Ya kele na mingi yina me nata ditoma na zulu ya bitembo, mpe me tambula kukondwa basapatu na makulu ya bawu, samu na kukuma na tabernacle awa, ya kele kieleka, samu na Kimfumu ya Nzambi.

45 Beno lenda banza artiste ke na kufikula kizizi ya nene, ya kitoko, tii ya kele kitoko mingi, mpe na manima kupasula kaka yawu? Ya ke vwanda na kima mosi ke tambula ve mbote na artiste yina. Beno lenda banza musoniki-nkunga kusunika nkunga tii ya kele kitoko mingi, mpe na manima kupasula kaka muziki ya yandi—ya yandi? Ya ke vwanda na kima ke tambula ve mbote na musoniki-nkunga yina. Beno me mona? Ya kele ve na kima ke tambula ve mbote na Nzambi. Nzambi ke salaka kima ya mutindu yayi ve, kaka kupasula yawu mpe kulosa yawu ntama. Ya kele samu na Kimfumu ya Yandi. Ya kele samu na Nkembo ya Yandi.

46 Mosi na mosi ya beto ke bulaka kitini na kizizi yayi mpe na nkunga yayi. Beto kele bitini ya Kimfumu ya Nzambi. Mpe yina kele, ti beto lenda bula bitini ya beto, ntangu nyonso yina beto ke bakula kisika ya beto ya kuvwanda, ke vwanda na kisika yayi, mpe kuna kuvwanda kaka kuna na kisika yina. Mpe kisika mosi beto zaba, ya kele na kati ya luzolo, samu ti ya kele yina ke salaka kizizi.

47 Ntangu yayi, ya kele mpasi ntangu beno ke mona ba-vision yayi mutindu yayi, mpe nyonso, samu na kubakula yina—yina kele na Lweka yankaka. Mu zolaka zola kuzaba. Muntu yayi kotisaka mwa kima yayi na yisi kuna, samu na kutuba ti baprofete ya ntama, bawu vwanda monaka ba-vision yayi, mpe nyonso yina, mpe wapi mutindu yina, bubu yayi, ke luta mpe

yina . . . Beto lenda ve kubakula yawu, kasi Mfumu me bika beto kukota na yawu mpe kumona yina ya kele.

⁴⁸ Ntangu yayi, bankundi, mu vwandaka ve ya kulala. Mpe munu, kaka na kati-kati ya beno na munu, mpe dibuundu yayi awa, mu vwandaka ve na kati ya vision. Mu zaba yina kele vision. Mwa awa, kaka sabala me luta, kuna, ya salamaka mingi, tii bambala makumi tatu, na nkokila mosi. Beno lenda banza kizitu yina kele na zulu ya beno. Ya ke sala beno kudasuka, ya kieleka.

⁴⁹ Yinki kana beno kwendaka na lukutakanu mutindu yina, mpe ti kaka kizitu, kana lukutakanu kubonga to ve, ya vwandaka na zulu ya beno, kaka—kaka kizitu yina? Beno fwana pesa mvutu na konso mulongi, na konso kyuvu, na kima nyonso. Kana lukutakanu kubonga to ve, ya kele kaka kizitu na zulu ya beno, mosi. Beno tala yina ya ke sala na beno.

⁵⁰ Mpe ya kele na bayina ke salaka na munu, ke tekaka kaka babuku, mpe nyonso yina, ba ke dasuka mingi, ti bawu fwana kwenda na yinzo, beno me mona, na kulala, ke lenda ve kukwiza na dibuundu na nkokila yina. Oh! Oh, ya kele kaka mpasi. Mutindu bokilo ya munu ya kento, ntwenya ya mwana ya kento ya Muklisto, ya mbote, Loyce. Kaka—kaka na kukwendaka na balukutakanu, kaka samu . . . Samu na basabala nana, to basabala sambwadi, ntangu nyonso mutindu yina, yandi zolaka kaka kulala na mbeto kilumbu mosi to bilumbu zole, beno me mona, samu na kuvwandaka ve na kizitu. Beno me mona? Billy, na kukabulaka kaka bakalati ya bisambu, mpe lembaka kaka.

⁵¹ Kasi, beno me mona, kizitu nyonso kele na zulu ya munu. Mu fwana tala na beno na kusambila samu na munu. Beno me mona? Na nganda ya yina, ba ke tuba ti—ti baminuti makumi zole ya—ya kulonga, na yisi ya ntwadusulu ya kimpeve, ke fwanana na bangunga nana ya kisalu ya ngolo, na nzutu ya beno. Mu ke longaka bangunga zole to tatu na nkokila mosi; bantangu yankaka bambala tatu na kilumbu mosi. Beno me mona?

⁵² Mpe na manima wapi mutindu samu na vision mosi? Vision mosi kusalaka Mfumu ya beto Yesu kulemba. Ya kele kieleka. Biblia ke tuba kento simbaka lele ya Yandi, yina salaka Yandi kulemba. Mbote, kana vision mosi ke sala Yandi kulemba, Yandi, Mwana ya Nzambi; Wapi mutindu samu na munu, musumuki vulukaka na nzila ya lemvo, yinki ke sala makumi tatu ya yawu na nkokila mosi? Beno me mona? Ya kele . . . Kana beto lendaka telema kaka mpe kubanza, ya kele ya kulutila bumuntu nyonso. Nzutu ya muntu ke lenda yawu ve. Mu ke vwanda na yinzo ya bilawu kisika mosi, ke vwanda na kubulaka yintu ya munu na bibaka. Beno me mona? Ya kele—ya kele kulemba mosi yina beno lenda ve . . . Ya kele kulemba na kati, beno me mona, yina ke kufwa kaka beno.

⁵³ Ntangu yayi, kasi na yina yinki beno ke landila na kukima mbangu? Mu lendaka tuba yayi. Mu ke mona Mpangi mpe

Mpangi ya kento Cox, kuna, Rodney mpe kento ya yandi, mpe mpangi ya kento, awa, na manima kuna, bandimi ya malu-malu. Ya kele na Yinsi, kaka kisika mosi kuna, ti kana beno lendaka kaka kubanza na dibanza ya beno mpe kutala Yawu mbote-mbote, Yawu kele kima ya kulutila nkembo. Yawu kele ya kulunga kulutila ngolo nyonso beto ke lakisa. Beno me mona?

⁵⁴ Ntangu yayi, ntete mu sambila samu na bambevo, mu lenda tuba yayi:

⁵⁵ Yinki ke salama kana mwana ya bebe, ntete yandi butuka, beto baka yawu, mwana ya bebe yina vwanda zinga na kivumu ya mama, bangonda yivwa yayi, mpe mwana bebe yina lendaka banza? Yandi ke tuba, “Beno zaba yinki? Ba ke tuba na munu ti mu ke na kukubamaka na kubutuka. Mbote, yinki mu ke sala na nganda kuna? Mu zaba kima ve kasi kisika yayi mu ke zinga awa. Mu ke kuzwaka ngolo ya munu na kati awa. Mpe wapi mutindu mu ke sala na kuzinga na nganda kuna? Ba ke tuba na munu ti ya kele na mwini ke lezima kuna. Ba ke tuba na munu ti bantu kuna ke tambulaka. Mpe mu zaba kima ve kasi kaka kisika yayi awa. Yayi kele nyonso mu zaba, kaka awa na kati—na kati ya kivumu ya mama ya munu. Ya kele awa ba nataka munu. Yayi kele nyonso mu zaba, ya kele kaka awa na kati ya kivumu yayi. Mpe ba ke tuba na munu ti ya kele kaka na kisika ntangu nyonso!”

⁵⁶ Mbote, mwana ya bebe yina ke vwanda na boma mingi, na kubutuka. Ya kele kieleka? Yandi ke vwanda na boma mingi, samu ti yandi ke na kukwiza na kisika yina yandi zaba kima ve, yina kele nene mingi, ya mafuku ya bambala nene mingi, na kisika yandi ke zingaka. Yandi ke zaba ve yina na bunene ya kele, yandi ke tuba, “Wapi mutindu, yinki mu ke sala?” Yandi ke vwanda na boma mingi, na kubutuka, kasi beto bayina ke zingaka na nganda awa, mbote, beto bayina vwandaka kuna na ntangu mosi, beto ke zola na ata mutindu mosi kuvutuka kuna, beto ke zola ve kuvutuka dyaka na kivumu ya mama. Beno me mona? Ve, beto ke zola ve kusala yawu.

⁵⁷ Mpe ya kele kaka mutindu ya kele ntangu beto ke na kufwa, nkundi. O Nzambi! Beno me mona? Beno ke na kubutama na Kisika mosi. Ata mbala mosi ve ti beno me vwandaka Kuna. Beno lenda ve kubakula Yawu, mutindu Yawu kele nene. “Wapi mutindu—wapi mutindu ya ke vwanda na nganda Kuna? Mu . . .” Mpe kima kaka yina ke sala ti mu bakula, to beno kubakula, ya kele mwa kusimba yina ya Luzingu, mutindu mpeve ke kotaka na bebe na kati ya kivumu ya mama ya yandi. Beno me mona? Ya kele kaka mutindu yina ti beto lendaka bakula yina kele Yinsi yina ya nene kuna, na yina ya ke vwanda ve na kimbevo, mpasi ve, lufwa ve, kununa ve, kima mosi ve. Oh, la la!

⁵⁸ Na yina, ntangu beno ke kuma Kuna mbala mosi, beno ke zola ata mbala mosi ve kuvutuka na kisika ya mutindu yayi, kulutila ve bebe ke zola kuvutuka na kivumu ya mama ya yandi.

Beno me mona? Ya kele nene mingi na Lweka yankaka, beno me mona, Kuna na ngaanda. Beto lenda ve kubakula Yawu, kieleka ve, beto lenda ve. Na yina, mutindu ya ke lutila mbanzulu nyonso ya mwana ya bebe yina, mutindu mosi ya ke lutila lubakusu ya beto nyonso na yina ya ke vwanda na ngaanda Kuna, beno me mona, samu ti beto kele na kati ya kivumu ya ntoto, ke kubama na kubutama na ntangu mosi, na kati ya Kimfumu ya malu-malu, na kati ya Yinza ya malu-malu.

⁵⁹ Mpe ya kele mutindu mu ke kuwaka na zulu ya ba-vision mpe bima yango ya mutindu yina, to yina nyonso kuminaka munu kilumbu yina ntangu mu sabukaka, kaka na lweka yankaka, mpe kumona yina Yawu wandaka, mpe na manima kuvutuka awa.

⁶⁰ Beno lenda banza na kuvwandaka bebe mpe—mpe vwandaka na luzabu na yina, mutindu nkembo yayi vwandaka na kutambula, na kumona bayinti kubasisa bafololo, bandeke kuyimba, mwini kulezima, mpe luzingu mosi mutindu yayi, mpe na manima kukangama na kati ya kivumu mosi? Na yina, beno ke zola ve kuvutuka, na mutindu nyonso.

⁶¹ Mbote, na yina, beto, mbanzulu ya beto—ya beto ke vwanda ya kulemba, na lweka kuna, to na kumekaka na kubanza yina ya kele na lweka Kuna. Ntangu, Masonuku ke tuba, “Ya ke bima yina disu me monaka ve, dikutu me kuwaka ve, to yina me kotaka ntete na ntima ya muntu yina Nzambi kele na yawu samu na bawu, na kibumbulu, bayina ke zolaka Yandi.” Beno me mona? Na yawu beto zaba ti ya kele nkembo na Simu yina yankaka. Kilumbu mosi, lufwa, yina beto ke bokila lufwa, ke pesa beto Mbutukulu ya malu-malu, mpe beto ke kota na Yinza yankaka, na Lweka yina yankaka.

⁶² Mpangi George, nge ke vwanda kiboba ve, kikata, na lweka Kuna. Mpe Mpangi ya bakala mpe Mpangi ya kento Spencer, mpe bayankaka mutindu beto bayina me nuna, mpe nyonso yina, mpe beto ke vwanda ntwenya kuna ntangu nyonso.

Yayi ya ntama...robe yayi ya nsuni mu ke bika, mpe ke telama
 Mpe ke simba ntalu ya kukonda nsuka,
 Mpe kuboka, na yina mu ke luta mupepe,
 “Mbote ya nsuka, mbote ya nsuka, na ngunga
 ya mbote ya kisambu!”

⁶³ Ya me manisa, kuna. Ata mbala mosi dyaka ve bampimpa ya bisambu, ata mbala mosi dyaka ve. Beno kota kaka na nsungi ya buntwenya, ya kyese yina na kuvwanda Kuna, ve kaka samu na mvula mosi, to bambula makumi tanu, to mafuku ya bamvula, kasi ntangu beto ke vwanda Kuna nkama ya byazi ya bamvula, beto ke banda kwandi ve na nyonso. Kaka yina. Na yawu samu na yinki beto lenda vwanda ve na kyese na suka yayi? Samu na yinki beto lenda sepela ve? Samu na yinki beto lenda baka ve ndandu na konso kima ya nene Nzambi me pesa beto?

64 Beto tala kubeluka ya Kinzambi. Samu na yinki Yesu kuzwaka mfimbu; samu na kubuka kizizi, na kutubaka, “Ya kele na kima ya mutindu yina ve”? Yandi kuzwaka mfimbu na nzutu ya Yandi kuna, bawanzio vwandaka talana, ti, “Na nzila ya bamputa ya Yandi beto kubelukaka.” Beto buka ve kizizi, na suka yayi. Beto yamba Yawu, beto ndima Yawu.

65 Ntangu yayi, mpangi ya bakala, mpe mosi na mosi ya beno ntangu yayi yina ba ke sambidila, kana beno lenda telema kaka pene-pene ya autel. Na yina nsangu me longama, mwa ntangu fyoti me luta, na nzila ya lutendulu mpe bandinga, ti beto ke tentika maboko na zulu ya bambevo mpe ke mona bisalu ya nene ya Nzambi.

66 Ntangu yayi, mpangi ya beto ya bakala, nge kele na nsatu ve ya kutelama, mpangi ya bakala, ya kulala kuna na mbeto ya bambevo. Beto ke kwiza na nge.

67 Kasi kana ya kele na bayankaka awa yina ba ke sambidila, ke zola kutelama pene-pene ya autel, na yina mpangi ya bakala mpe munu ke sambila mpe ke tentika maboko na zulu ya bambevo, beno kwiza na ntangu yayi. Mpe beno bambuka moyo, beno yamba kizizi yina, “Na bamputa ya Yandi beto belukaka.”

68 “Mu ke bakula yawu ve, Mfumu.” Kieleka, beno ke bakula ve. Beno kele dyaka na kati ya kivumu ya ntoto.

69 Kasi Yandi salaka kukubika yina. Mpe Yandi zolaka baka ve. . . Samu na yinki Yandi kuzwaka mfimbu? Kaka samu na kubuka kizizi, to samu na kubuka nkunga, na kukubika yawu? Ve, tata. Yandi kuzwaka mfimbu, lwalaka, mpe basisaka menga, ti beto lendaka beluka. Mpe na nzila ya yina, beto, “Na bamputa ya yandi, beto me beluka,” mosi na mosi ya beto. Ntangu yayi, mutindu beno ke kwiza, ke vukana pene-pene ya autel samu na kisambu.

70 Ntangu yayi, mingi ya mutindu ya kumwangisa nsangu ya bantu ya Amerika na ba-sensation ya kulutula yayi awa, mpe yina ba ke zonzaka, “Beni fwana sala yayi, kusala yina.”

71 Mu zola vwanda na kieleka na beno, nkundi ya munu. Kima mosi, na mutindu Nzambi ke belusaka, ya kele na zulu ya lufulu ya kusalu samu na Yandi. Beno me mona? Ya kele na zulu ya lufulu ya kusalu samu na Yandi. Beto fwana ndima kubeluka ya beto na zulu ya lufulu, ya, beto ke sadila Yandi na manima beto me beluka. Ntangu yayi, Biblia ke tuba, “Beni funguna bafoti ya beno, mosi na yankaka. Beno sambila samu na mosi na yankaka, ti beno lendaka beluka.” Beno me mona? Ya kele na zulu ya lufulu, beno ke sadila Nzambi. Mingi na kati ya beno awa, mu banza, kele na kati ya kondisyo ya kufwa, mpe beno—beno fwana kufwa kana kima kusalama ve. Na yina mu zola beno, na kati ya ntima ya beno. . .

72 Ntangu yayi, beto lendaka kupakula beno na mafuta, beto lendaka sambila samu na beno, pasteur mpe munu, kusambila

kisambu ya lukwikilu, kusala nyonso yina beto lenda sala, kasi ya ke sala ata mbote ve tii beno beno mosi ke kota na kubundana na Klisto. Beno me mona? Beno fwana kwiza na kubundana yina, ti, “Mu, Mfumu . . .”

⁷³ Mu ke mona mama mosi ya ntwenya kutambula kaka kuna na ntangu yayi. Yandi kwizaka awa, ntama mingi ve na yinzo, na kima ya mutindu tumeur, to kimbevo ya Hodgkin. Mpe yandi kele Methodiste, na nzila ya lukwikilu. Mu ke kwikila ti ya kele kieleka, mutindu yina ve, mpangi ya kento? Mpe yandi vwandaka na kuvimba mosi ya nene na lweka. Mpe ntangu yayi kuna yandi me telama, me beluka.

⁷⁴ Mu ke mona Mpangi ya kento Weaver ya kutelama awa, yandi vwandaka mosi ya bambevo ya yimbi ya cancer yina mu me monaka ntete, na luzingu ya munu nyonso. Kima ya ntete mu lombaka yandi vwandaka, kana yandi ke “botama na Nkumbu ya Yesu Klisto,” mpe ke funguna masumu ya yandi. Ntangu mu nataka yandi na kati ya maza yayi awa, mu zolaka simba yandi; yandi vwandaka ya kukonda mingi, maboko ya yandi, kaka mwa bima ya fyoti. Mpe yandi kuzwaka mbotika na Nkumbu ya Yesu Klisto. Mpe ya ke luta ve bamvula kumi, mutindu yina ve, mpangi ya kento? [Mpangi ya kento Weaver me tuba, “Ve. Ya me kuma bamvula kumi na sambanu me luta.”—Mu.] Bamvula kumi na sambanu me luta. Bamvula kumi na sambanu ya luzingu yina ba me keba, samu ti yandi vwandaka ya kukubama na kutumama. Na ntangu badokotolo ya kulutula mbote na lweka awa . . .

⁷⁵ Kuna, dokotolo ya yandi mosi tubaka na munu. Ntangu, mu tubaka na yandi—tubaka na yandi, tubaka, “Yandi me beluka.”

⁷⁶ Yandi tubaka, “Oh, oh! Yandi ke kufwa na cancer, na basabala fyoti. Kukikwamisa ve samu na yawu. Yandi ke kufwa. Na basabala fyoti dyaka, yandi ke kufwa.” Mpe yandi pesaka yandi yimeni kaka na kutala kilumbu mosi na kuzinga. Mpe yandi yayi awa, bubu yayi, na manima ya bamvula kumi na sambanu, ya kutelama na autel. Yinki dyaka mu lenda tuba, ya me salama bambala na bambala mpe bambala na bambala!

⁷⁷ Ntangu yayi, Nzambi ke salaka kaka yawu ve samu na mosi ya bana ya Yandi, mpe ke salaka yawu ve samu na bana yankaka. Yandi ke salaka yawu samu na bana ya Yandi nyonso. “Muntu nyonso zola lenda kwiza.” Ya kele . . . Ba me bokila beno na Yandi. Ntangu yayi, “Kisambu ya lukwikilu ke vulusa mbevo.” Biblia me tuba yawu.

⁷⁸ Ntangu yayi—ntangu yayi, kana . . . yina mu zola ti beno sala, kele kufunguna yimbi ya beno na Nzambi, mpe kutuba, “Mfumu, belusa munu.” Kana beno me ndimaka ntete ve, beno pesa bantima ya beno na Klisto. Mpe kana beno me kuzwaka ntete ve mbotika, na kukotaka na maza, na Nkumbu ya Yesu Klisto, ya kele na ndonga ya maza ya kukubama. Beno me mona?

⁷⁹ Mpe ntwenya ya mama yayi na lweka yankaka ya bala-bala awa; na ntangu muntu ya kukwikama ve yina kundimaka na nzila ya yawu. Na yina yandi vwandaka ya kulala . . . Ba vutulaka yandi na yinzo na Silvercrest, na tuberculose, yandi vwanda kufwa. Mpe na ntangu mu kwendaka kuna, mpe Mfumu kupesaka vision, tubaka, “Yandi ke beluka.”

⁸⁰ Mpe yandi kutanaka na munu kuna, na suka yina landaka, Tata Andrews, mpe sembaka kaka munu. Yandi tubaka, “Kivuvu ya luvunu ya mutindu yina, na zulu ya kento yina!”

⁸¹ Mu tubaka, “Tata Andrews, ya kele ve kivuvu ya luvunu. Kento yayi kele Muklisto. Mpe ntangu yandi ke kuzwa lenda, yandi ke kwiza kuzwa mbotika.”

⁸² Mpe yandi tubaka, “Yandi ke na kufwa.” Yandi tubaka, “Mu. . . Wapi mutindu ba lendaka na kuvutula yandi na yinzo na Silvercrest?”

⁸³ Mu tubaka, “Tata, nge ke na kusalaka, nge ke . . . Na yina nge ke na kusalaka, nge ke na kusalaka na yina dokotolo me tuba. Mu ke na kusalaka na yina Nzambi me tuba.” Beno me mona?

⁸⁴ Ntangu yayi, ya kele kaka ya kuswaswana, yina beno ke na kusalaka. Beno me mona? Beno ke tala na yina dokotolo me tuba, ya kieleka beno ke kufwa. Kasi beno fwana tala na yina Nzambi me tuba. Wapi ndinga beno ke baka?

⁸⁵ Yinki kana Abraham zolaka baka dibanza ya dokotolo na yina yandi vwandaka na bamvula nkama mosi, mpe ke kuzwa bebe na kento ya yandi, ya bamvula makumi yivwa? Yinki yandi zolaka sala kuna? Beno me mona? Kuna, dokotolo zolaka tuba, “Muntu yayi me lawuka.” Kasi Nzambi tangaka yawu na yandi samu na ludedomo, samu ti yandi kwikilaka Nzambi. Beno me mona? Ntangu yayi, beno . . .

⁸⁶ Mpe kento yango kuzwaka luzingu. Yandi kipe ve dyambu ya kuzwa mbotika, na Nkumbu ya Yesu Klisto, samu mu banza ti yandi vwandaka Methodiste to Presbyterien. Yandi bandaka na kukuma ya kubela mpe ya kubela. Mpe yandi kwizaka mpe bakaka Grace Weber, yina vwanda vwandaka kaka . . . to yina ke vwandaka dyaka kuna, mwana ya yandi ya kento ke vwandaka kuna. Robe, mpe kwizaka awa, mpe kuzwaka mbotika na Nkumbu ya Yesu Klisto, na fievre, na kuvimba bisika nyonso na mapeka ya yandi mpe nyonso, na fievre, ya kitezo ya makumi yiya. Mpe kuzwaka kaka mbotika awa, na Nkumbu ya Yesu Klisto. Mpe yandi ke vwandaka kaka na lweka ya bala-bala awa. Yandi lendaka vwanda ya kuvwanda awa ntangu yayi. Mu vwanda tala baminuti fyoti me luta, bisika nyonso kana mu lendaka mona yandi. Beno me mona? Kutumama, beno me mona.

⁸⁷ Ya kele kaka ve kukwenda . . . Mu ke wisana ve na bayankaka ya bampangi ya beto, bayina ke tentika kaka maboko na zulu ya *yandi yayi, yandi yina*, mpe *yankaka yina*, mutindu yina, mpe ke tuba ti mutindu mosi ya lukwikilu ya ba-sensation ke sala

yawu. Ya kele mutindu yina ve. Beno fwana vwanda na lukwikilu ya kieleka, ya kukangama, ya Biblia, ya Mpeve-Santu. Beno me mona? Ya ke simba ve, ya ke sala bilumbu ve. Ya ke salaka bilumbu ve.

⁸⁸ Ya kele samu na yina mu lenda vutula matondo na Mfumu ti Yandi me sadisa munu tii awa. Kubeluka ya banzutu yina me salama me vwanda ya kieleka, samu ti ya kele kieleka ya kutunga na zulu ya MUTINDU ME TUBA MFUMU. Beno me mona? Na yawu ya ke telama.

⁸⁹ Ntangu yayi—ntangu yayi, na yina mwa lukolo ya Lumingu, mu vwanda vingila kaka minuti fyoti, na yina mu vwandaka zonga na beno, tii bawu ke kuzwa bisika ya bawu, na kuvwanda mbote, na yawu beto lenda vwanda swi ntangu yayi. Ya me bikana na beto kaka mwa baminuti, beto ke sambila, ke banda kusambila.

⁹⁰ Ntangu yayi, mu zola ti mosi na mosi ya beno kufunguna yimbi ya beno na Nzambi, mpe kusila Nzambi ti beno ke sadila Yandi mpe ke sala nyonso yina beno lenda. Mpe pasteur mpe munu ke vwanda na kusambila, mpe ke kwiza tentika maboko na zulu ya beno, mpe kubeluka ya beno kele kieleka kana beno kwikila yawu.

⁹¹ Wapi mutindu bantu yina vwandaka na ba-bequille, mpe ya kufwa makutu, mpe mababa, mpe bampofu, Lumingu me luta na manima ya midi, kumataka kaka na estrade, losaka ba-bequille ya bawu; mataka na estrade, meso kuzibukaka, beno zaba, mutindu yina? Bankama na bankama ya bawu! Na yina, mu vwandaka ya kulemba mingi, na kutala ti ba zolaka nangula munu na kubasika na kisika, kaka ya kutelama, bawu vwandaka luta. Beno me mona? Ndonga yina zolaka katuka awa tii na Lukolo ya Nene ya Jeffersonville, na kutala, bantu na ndonga, ke luta na ndonga. Mpe mu zaba ve kana ya kele na mosi ya bawu, yina lutaka, kasi yina belukaka ve. Beno me mona? Samu bawu kwizaka na nzila ya lufulu ya Buklisto ya kieleka, mpe vwandaka kwikila. Bawu. . . Ya zolaka salama.

Ntangu yayi beno kulumusa bayintu ya beno, muntu nyonso, beno sadisa munu kusambila samu na bawu.

⁹² Mfumu Yesu, beto ke nata na Nge, na suka yayi, bantu yayi yina me telama awa, yina ke na kuingila, bana ya kubela, ya kukwamisa, ya kunyokama. Bawu me luta kivuvu nyonso, mingi ya bawu, Mfumu, badokotolo me manga, mingi-mingi bakala yayi ya kulala awa na zulu ya mbeto ya bambevo yayi. To ya ke vwanda lemvo ya Nge to yandi ke basika na yinza na bilumbu fyoti. Mpe kukondwa ntembe, ya lendaka vwanda na bayankaka ya kutelama pene-pene ya autel awa, na kukangama ya ntima ke vingila bawu, mpe bimbevo, mpe bampasi yina ke buka bawu.

⁹³ Ya kele kaka na kima mosi, Tata, yina lenda vuukisa bawu, ya kele, kukwenda na zulu ya ba-sense tanu ya nzutu yayi awa,

kisika badokotolo me meka na mutindu ya kulunga, kukondwa ntembe, na kuvuukisa luzingu ya bawu; na bimbevo, ya cancer, ya tuberculose, ya mpasi ya ntima. Mpe kutunga nyonso, mpe ba-tube, mpe bima, mpe—mpe—mpe bankisi yina ke nwanaka na bamiklobe, mbeni ke na kulandila na kununga kisika, samu na kubaka luzingu ya bawu.

⁹⁴ Mpe mu me tuba, Mfumu, mu banza, dibanza ya Nge, na bawu. Mpe mu me kuwa muntu kutuba na bandinga na suka yayi, mpe me pesa lutendulu yina, na yina ke salama bubu yayi. Bayankaka ya bawu ke kuzwa yawu, Mfumu, ya kieleka. Ya kele kieleka. Mu ke kwikila yawu.

⁹⁵ Mpe ntangu yayi, mutindu ya kele ya kusonika na Biblia, ti David, mwa muvungi ya mwana ya bakala yina, vwandaka keba mameme ya tata ya yandi, kuna na manima ya ntoto ya kuyuma. Mpe kilumbu mosi nkosi mosi kwizaka mpe bakaka mosi ya mameme ya tata ya yandi, mpe kwendaka na yawu. Mpe mwa muvungi ya mwana ya bakala yina, na lukwikilu, yinki vwandaka na yandi na kunwanisa nkosi yayi? Carabine ya bilumbu yayi ve to munduki ya tiya ve. Kasi yandi vwandaka na lanse mosi ya fyoti, mpe yandi landaka nkosi yina. Yandi kufwaka nkosi yina, mpe yandi vutulaka dimeme yango. Uлуу mosi kwizaka mpe bakaka mosi; yandi landaka ulusu yina zolaka nika kwandi yandi. Kasi yandi banzaka ve na ntela ya ulusu, to na ngolo ya nkosi, to na mbangu ya yandi, to na kulembana ya yandi na lanse.

⁹⁶ Kasi na ntangu yandi telamaka na ntwala ya ntinu Saül, yandi tubaka, “Kisadi ya nge vwandaka keba mameme ya tata ya yandi, mpe nkosi mosi kwizaka mpe bakaka mosi, mpe kwendaka. Mpe mu landaka yandi mpe vutulaka dimeme.” Yandi tubaka, “Nzambi mosi yina vulusaka munu na diboko, to na dikulu ya ulusu yina, to na makulu ya nkosi yina, lenda baka Philistin ya kukondwa nzengolo yayi mpe kutula yandi na diboko ya munu.”

⁹⁷ Mpe beto zaba mutindu disolo kulandilaka, ti yandi kufwaka; yandi kufwaka muntu yina vwandaka bambala mingi, bambala mingi nene na yina yandi vwandaka, mpe yina vwandaka kinwani. Mutindu ya pesaka kizungu-nzungu na Saül, ntinu ya nene yina, muntu yina ya nene, ya ngolo, na mutindu ti ntwenya ya mwana ya bakala yina zolaka vwanda na lukwikilu mingi na lanse mosi. Ve, na lanse ve, kasi na Nzambi.

⁹⁸ Ntangu yayi, Mfumu, ya kutelama pene-pene ya autel yayi, ya kulala awa na mbeto ya bambevo yayi, ya kele mameme ya Nzambi, bana ya fyoti ya mameme, na yina ya kele, ya Yandi. Ba me simba bawu na nkosi ba ke bokilaka cancer, na ulusu ba ke bokilaka tuberculose, na bimbevo yankaka yina me simba bawu, mpe me ningisa bawu, mpe me buka bawu na bitini-bitini. Mfumu, mu—mu me kwiza baka bawu, na lanse ya fyoti ba ke

bokila kisambu ya lukwikilu. Ya kele kima ya nene ve, kasi mu zaba yina yawu me salaka. Mpe mu zaba ti ya kele dyaka Nzambi mosi. Mu me kwiza baka bawu, na suka yayi, samu na kuvutula bawu, Mfumu, na matiti ya madidi ya mavimpi ya mbote, kuna pene ya bamaza ya mbote ya ngemba, mpe ntama na kuningana ya bawu, samu na kukwikila na Nge.

⁹⁹ Mpe mu me kwiza baka bawu, na kinwaninu yina Nge pesaka na kukwendila. “Kisambu ya lukwikilu ke belusa bambevo, mpe Nzambi ke telemisa bawu. Kana bawu salaka disumu mosi, ba ke lemvočila bawu yawu.”

¹⁰⁰ Mpe, Tata, beto ke kwenda ntangu yayi na kukutana mbeni, na kukutana na nkosi, na kukutana na dyabulu na mutindu nyonso na kati ya yina yandi kele, yina ba ke bokilaka cancer, tuberculose, kimbevo ya Hodgkin, mpasi ya ntima, mutindu nyonso yankaka ya kimbevo. Beto ke kwiza na kuzwa yandi, mpe na kuvutula dyaka mwana ya dimeme yayi na Yinzo ya Nzambi. Na Nkumbu ya Yesu Klisto beto ke kwenda, samu na kusadila lanse yayi yina Nge pesaka beto. Vwanda na beto, Tata, na yina na luzitu nionso beto ke belama na Nge na ntangu yayi, na Nkumbu ya Yesu.

¹⁰¹ Mu zola ti beno bika bayintu ya beno ya kukulumusa. Mpe beto ke na kubelama na kupakula bantu na mafuta, mpe kutentika maboko na zulu ya bambevo, mpe kisambu ya lukwikilu ke vuukisa bambevo. Muklisto nyonso na kati awa, beno tula lukwikilu ya beno na ndonga ya bisambu yayi.

[Mulonga ya bisambu me baka baminuti tatu mpe ndambu, mingi ya bampova ya Mpangi Branham ke na kuwakana mbote ve—Mu.]

Na Nkumbu ya Yesu Klisto!

Na Nkumbu ya Yesu Klisto!

Na Nkumbu ya Yesu!

Na Nkumbu ya Yesu Klisto!

Na Nkumbu ya Yesu!

Tata, mu ke semba dyabulu! . . . ? . . .

Na Nkumbu ya Yesu Klisto!

Na Nkumbu ya Yesu Klisto! . . . ? . . .

Na Nkumbu ya Yesu Klisto!

Beno kwiza mpe beno kwikila yawu . . . ? . . . mpe ya ke salama! . . . ? . . .

Mfumu, Nge . . . ? . . .

Nzambi . . . ? . . .

¹⁰² Mfumu, Nge kele . . . Nge sonikaka bweso yayi. Nge kele Tata, Klisto! . . . ? . . . Na Nkumbu ya Yesu Klisto!

103 “Kisambu ya lukwikilu ke vulusa mbevo.” Mu zola ti Nge sala yawu samu na yandi. Vutula yandi na kento ya mavimpi ya mbote! . . . ? . . .

Na Nkumbu ya Yesu Klisto, vutula yandi!

Na Nkumbu ya Yesu Klisto, vutula yandi! . . . ? . . .

Na Nkumbu ya Yesu Klisto, mu ke vutula mpangi ya munu ya kento.

Na Nkumbu ya Yesu Klisto, mu ke vutula mpangi ya munu ya bakala! . . . ? . . .

Na Nkumbu ya Yesu Klisto! . . . ? . . .

Na Nkumbu ya Yesu Klisto! . . . ? . . .

Na Nkumbu ya Yesu Klisto! . . . ? . . .

Nge me salaka yawu ntete ve. Mfumu kusakumuna nge!

Mu me kwisa baka yandi, na suka yayi! . . . ? . . .

104 Na Nkumbu ya Yesu Klisto, mu ke vutula nge, na nzila ya kisambu ya lukwikilu, na ngaanda ya kimpika! . . . ? . . . Beto ke bwela lukwikilu ya beto na bayayi . . . ? . . .

Kwikila kaka;

Na bayintu ya beto ya kukulumusa ntangu yayi. Ntangu yayi:

Kwikila kaka, kwikila kaka,

. . . nyonso lenda salama, kwikila kaka.

O Mfumu, mu ke kwikila, O Mfumu, mu ke kwikila,

Bima nyonso ke salama . . .

Beto telemisa kaka maboko ya beto ntangu yayi.

. . . Mfumu, mu ke kwikila;


O Mfumu, mu ke kwikila; Mfumu, mu ke kwikila,

Nyonso ke salama, Mfumu, mu ke kwikila.

105 Tata ya beto ya Mazulu, bayina lendaka kutelama, me telemisa maboko ya bawu, ti bawu me ndima yawu. Mpangi ya bakala yayi yina vwandaka ya kulala na mbeto ya bambevo, me telama, samu na kulakisa ti yandi me ndima kubeluka ya yandi. Beto ke kwikila, Mfumu, ti bawu ke na kuvutuka na ngemba nyonso ntangu yayi na matiti ya madidi, na bamaza ya mbote, samu na kuvwanda dyaka mbote, na nzila ya Nkumbu ya Yesu. Beto me vutula Nge matondo samu na yawu. Amen.

106 Mbote mingi, Mpangi Neville, mu ke vwanda awa mpe mu ke kuwa nge kulonga ntangu yayi.

107 [Na banzila ya ntete ya dilongi yayi Mpangi Branham talaka na “kima ya fyoti ba kotisaka” na Mpangi Thomas R. Nickel, Musoniki ya Full Gospel Men’s Voice, yina vwandaka ya kutula

na paze ya ntete ya zulunale, yina ke tuba mutindu yayi: “SAMU NA FOTO YA NTETE NA PAZE YA NTETE YA ZULUNALE: Na Bilumbu ya Biblia, ya vwandaka na bantu ya Nzambi yina vwandaka bapofete mpe mimoni. Kasi na kati ya Babuku nyonso ya Santu, ata mosi ya bayayi me kuzwa ministele ya nene kulutula na yina ya William Branham, profete mpe mumoni ya Nzambi, yandi yina foto ke monika na paze ya ntete ya zulunale yayi ya Full Gospel Men’s Voice. Ba me sadila Branham na Nzambi, na Nkumbu ya Yesu, samu na kuvumbula bantu ya kufwa!”—Mu.] 

NA MANIMA YA RIDO YA NTANGU KNG61-0305
(Beyond The Curtain Of Time)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 5 ya Ngonda ya tatu, na mvula 1961, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org